



FM 2015/59

13/05-2015

Michael Rosing

Apeqquteqaat tunngavigalugu oqallittoqarnissaanik siunnersuut, qanoq iliornikkut aalisartunut piniartunullu atortuminnik piniutiminnillu ajunaarnersuaqartillugu annaasaqarsimasunut pisortaniit ikiorsiisarnep nukittorsarneqarsinnaanera pillugu.

(Inatsisartunut ilaasortaq Anthon Frederiksen, Partii Naleraq)

Ileqqorloriarsinnaaneq ersingingaanni politikki inuutissarsiutitut toqqarneqassanngilaq. Kisianni aningaasarsiornermut taaguutaavoq pisunut akunnermiliuttartut, soorlu sulliviit imaluunniit atuisartut immikkoortunut assigiinngitsumik ilisimasaqartillugit pisumut attuumassuteqartumut. Assersuut paasiuminarnerusoq tassaasinnaavoq qitornat kaasarfimmiussaannik tuniorartuaraanni taava paarinissaat ilikkarnaviannngilaat. Tassanilu siunnersuuteqartoq isumaqatiginngilarput. Paasisinnaanngilarput sooq Inatsisartuni partiit arlallit aalisartut piniartullu meeqqatut nammineersinnaanngitsutut piinnavinneraat.

Uanga aamma inuutissarsiutigisannik angallateqarpunga, ukiut tamarluinnaasa sillimmasiisarfimmut aningaasarpassuarnik akiliisarpunga pigiinnarumallugu. Ukiumut aningaasartuutima annerpaat taanna ilagaat. Taamaaliorpungali qularnaarumallugu angallatiga umiussagalarpat akiligassarpassuaqalersinnaanera. Aamma sillimmaseqqavara aningaaseriviup aningaasanik attartorfigisama tamanna piumasarimmagu. Kialluunniimmi angallammi nutaamik tuniunnannngilaanga maannakkut pigisara umiussagalarpat. Aamma ajunngilaq. Uanga nammineq qinernikuuvvara inuutissarsiutiginiarlugu, taamaattumik ajutuussagalaruma uanga nammineq kisima tamanna akisussaaffigisussaavara.

Isumaqarunnaartariaqarpugut aalisartut piniartullu sutigut tamatigut ikiorneqartuartaqartut. Aalisartuuguma piniartuugumaluunniit nuannarinaviannngilara kikkut tamarmik imminut isumagisinnaanngitsutut piuassappannga. Aalisartunut piniartunullu taamatut pissusilersortuarneq arlaannaannulluunniit iluaqutaanngilaq.



DEMOKRAATIT
DEMOKRATERNE

Taamatut naatsumik oqaaseqarluta Demokraatini qilanaarpugut partiit allat pisamut isumaasa tusarnissaannut.